

Ukiortaami oqalugiaat 2005

Hans Enoksen, Siumut, Naalakkersuisut siulittaasuat

Asakka ataqqinartut innuttaasut nunatsinni najugallit tamassi. Aammalu kalaaleqatigut nunatta avataani najugallit. Naalakkersuisut sinnerlugit ukiumut qangiuttumut uummammik pisumik qutsavigalusi ukiortaami pilluaqquassi. Qujanarlu ukiumi qaangiuttumi inuiaqatigiinni suleqataalluarsimanissinnut, qanortorlu ukioq nutaaq ajunngitsumik tamassinnut atugassaqarfiuli Nunatta asasatta kiffartuullugu ineriartortinnissaanut.

Ataqqinartorsuaq Dronning uialu, kunngissaq nulialu, qallunaat naalakkersuisui savalimmiunilu naalakkersuisut, ukiortaami pilluaqqullugit inuiaqatigiit sinnerlugit inuulluaqqussuteqarfigaakka.

Ukioq nutaaq tamatta nutaanik ilikkagaqarfigalugulu misigisaqarfissarput aallartippoq. Qilanaarpunga sapiissutsip kajumissutsillu anersaavi pigalugit suleqatigiinnissatsinnut.

Ukioq qaangiuttoq sorpassuarnik pisoqarfiuvoq aamma uagutsinnik nukittortitsisunik. Tamassi qutsavigerusuppassi suleqataalluarassi. Immikkut eqqaaniarpakka ukiumi qaangiuttumi ilaminnik toqkkut annaasaqarsimasut, misiginneqatigaassi, nukissamik inuunerullu ingerlariaqqinnissaanik peqqinnermillu tunineqarnissassinnik kissaappassi.

Immikkut ukiortaami tamanik ajunngitsunik kissaallugit pilluaqquniarpakka napparsimallutik nunatta avataani ilaqutaminnik qimagussimallutik nalliuttorsiorariaqartut, neriuutigaara peqqissillusi ajorunnaarluarumaartusi aammalu Danmarkimi nunanilu allaniittut inuusuttut nunarput asasarput siumukartinniarlugu ilinniartut angusaqarluarnissaannik isumalluarfigalugit ukiortaami pilluaqquakka. Taamatutaaq kilisaatini avataasiorlutik aalisartut nunatta aningaasarsiornikkut ingerlalluarnissaanik sunniuteqaqisumik ilungersorlusi sulisusi ilumoorlusi nunatsinni kiffartuussinissinni qutsavigalusi, ukiortaami uummammik pisumik pilluaqquassi.

Napparsimavinni, utoqqaat illuini, paaqqinnittarfinnilu sulisut, allanilu sulisorpassuit pinngitsoorneqarsinnaanngitsut nalliuttorsuarni tunniusimallusi sulinissinni annertuumik qutsaviginiarpassi ilumoorlusi tatiginartumillu kiffartuussinersi pillugu.

Namminersornerulernitsinniit ukioq kingulleq ukiut 25-ingorlugit nalliuttorsiornerput nuannersumik misigisaqarfigisarput meeqqat, inuusuttut, inersimasut, utoqqaallu ataatsimoorluta nuannersumik peqataaffigisarput, iluatsilluartumik aqqissuunneqarnerani peqataalluarnissinnut tamassi qutsaviginiarpassi. Innuttaasut, inatsisartut, Naalakkersuisullu sinnerlugit nuannaarutigalugu tulluusimaarutigalugulu qjassutigaa nalliuttorsiornerput aamma nunatsinnut kusanartumik kinguneqartussamik nunatta avataani malugineqarluarmat.

Aammalu puigunngilakka qutsavigalugillu innuttaasut kajummissusertik tunngavigalugu peqatigiiffinni allanilu inuiaqatigiinni suleqataasut. Sulinersi inuusuttunut, inersimasunullu, sunniuteqarluortoq nukissamillu tunisiuortoq pillugu qutsavigaassi kiisalu peqatigiiffippassuit innuttaasut atugaasa pitsaanerulernissaannut ullunilu nalinginnarni inuunerup qiimmassaqatigiinnerullu nukittorsarneranut suleqataasut tamassi ilanngullusi qutsaaviginiarpassi, aamma utoqqaat maligassiuilluarnerisa

sunniuteqaleriartornerat misigisarput pillugu qujarusuppunga tulluusimaarutigissallugumi pissutissaqarpugut utoqqaammi timersoqatigiinnikkut peqatigiiffeqarnikkullu nukittuumik takutitsisarnerat tamatta anersaakkut uummarissaatigaarput.

Inuiaqatigiit kalaallit siunissamut isumalluarlutik anguniaqarfiusumillu peqataarusulernerat malunniukkiartuinnartoq pissutissaqarpugut nuannaarutigissallugu, inuiaqatigiimmi nammineersut nukittullu pilersinneqassappata innuttaasut nammineerlutik nunartik ingerlaasissartillu aaqqissuuttussaavaat allat kisiisa utaqqiinnarnagit. Namminersorneq pillugu isumalioqatigiissitat sulinissaat tunaartassaallu inatsisartut toqqammavissiisutaat, naleralugit aallartilluarpoq. Ataatsimut isigalugu siunnerfippit tassaavoq Nunatta imminut napatinnerulernissaanut aqputissiuussinissarput, tamannami tunngavigalugu patajaatumik siunnissarput aqputissiuussavarput tassalu Kalaallit Nunaat Naalagaaffeqatigiit iluani Namminersortoq, Ungasinnerusorlu isigalugu Namminersulivinnissamut alloriarnerusaaq.

Kikkut tamarmik inuiaqatigiit aningaasarsiorneranni peqataasariaqarput, inuiaqatigiimmi inuutissarsiornikkut aningaasarsiornikkullu nukittunerusumik inississappata sulisinnaasut tamarmik peqataanissaat pingaaruteqarluinnarpoq. Minnerunngitsumillu inuiaqatigiit ilinniartitaanikkut killiffiat malunnarluartumik nukittorsaafigineqartariaqarpoq. Qulakkeertariaqarparput kinguaassatta uangutsinnit ilisimasaqarnerunissaat. Ilisimasarneruleriartornerup ilinniagartunerullu angujartornera peqatigalugu kalaallit nunaqavissut sulisorineqarnerat alliaartusaaq inuiaqatigiit kiffartuunneqarneranik pitsaanerusumik kinguneqaannarani aammali ilisimasat pigiinnarneqartalernerannik kinguneqassaaq, aningaasallu amerlanerusut inuiaqatigiinni atorneqalernerannik aamma suliffissanik ataavartunik amerlanerusunik pilersitsisumik.

Aningaasarsiornermi ilisimasalissuit nunatta imminut akilersinnaannginnera tapiissutaannarnillu napatinneqartuarnissatsinnik naliilisarnerat uniffigiinnarsinnaanngilarput. Tamakku uagut inuiaqatigiit kalaallit eqqarsaatnik isummanillu nutaanik pilersitsisinnaassuserput killilersussanngilaat. Nalunngilarpummi siulitta timikkut anersaakkullu nukittoorsuit nuna manna inuuffigissallugu naleqqussarsimagamikku najortuarsimagaat, uagutsinnullu kalaallinut inuiaqatigiinnut tunniullugu, nuna manna uagut pigaarput siulitta tunniussa, taamaammat sanarfissavarput inuiaqatigiinnut kalaallinut naapertuutumik ineriartortittuassavarput ingerlaaseqartuaqqullugu.

Nammaqatigiinneq inuiaqatigiit ingerlatitaaneranni annertuumik ukiorpassuarni iluaqutaallunilu atuussimasoq aamma assortunngilarput, ukiunili makkunani aningaasarsiornikkut inissimanerput eqqarsaatigalugu naleqqussarnissarput pinngitsoorsinnaajunnaarparput pingaartumik avataaniik eqqussuktagut taamatut ikkallartillugit, olie-ip akia qaffakkiartuinnartoq, minnerunngitsumillu aamma avammut niuerutigisagut rejet akiisa appasippallaalernerat pissutigalugit, kommunillu isertitaasa qaffakkiartorunnaarnerat, aningaasartuutillu qaffakkiartuinnartut isertitakkagullu ikiliartuinnartut naleqqussarneqassappata akit akilertakkagut aallaavigalugit aaqqissuussisariaqalerpugut.

Innaallagissap erngullu akiisa assigiigunnarnissat ukiortaaq manna aallarnerfigalugu atuutilissaaq.

Akit assigiigunnarnissaatigut anguniarneqanngilaq innuttaasut atugaasa ajornerulernissaat, aammalu siunertaanngilluinnarpoq nunaqarfimmiut, illoqarfinnilu minnerusuni, isorliunerusunilu najugallit atugaasa ajornerulernissaat, akerlianilli pitsaanerusumik naapertuunerusumilli aammalu akikinnerusumik

akiliisalernissaat anguniarparput, Nammaqatigiinneq ilaatigut sinnassaatigaarput, inuiaqatigiit ataatsimut isigalugit sukkanerusumik ineriartornissaannut noqitsisoraarput, aningaasarsiornikkut ineriartornissamut annertuumik kinguarsaasuulluni.

Taamaammat akit assigiigunnarsinneqarneri malinnaaffigilluassallugit Naalakkersuisooqatigiit Kommuunillu kattuffiat KANUKOKA isumaqatigiissuteqarpugut. Siunertaanngilarmi innuttaasut kommuunillu atugaasa ajornerulernissaat, tamannalu pissutigalugu ukiut tamaasa akinik allannguutinillu nalilersuisarnissaq Naalakkersuisut ingerlatissallugu inatsisartunut kommuuninut inuiaqatigiinnullu neriorsuutigaat. inuiaqatigiimmi kissaatiginngilaat akilertakkamik annertunerulernissat, aammalu akileraarutinik qaffaasoqarnissaa, akerlianilli akilertakkamik minnerulernissaat, aatsaallu tamanna anguneqarsinnaavoq akit akilertakkagut qanoq annertutiginersut piviusumik takusinnaanngorutsigit, tamannalu aatsaat anigorneqarsinnaavoq sumiiffinni akit akilerneqartartut innuttaasut tamarmik ilisimalerpatsigit.

Ilinniartitaanerit nukittorsarneqarnissaat Naalakkersuisooqatigiit pingaartilluinnarpaat tamannalu pissutigalugu 2005-mut aningaasat ilinniartitaanermut atugassiissutigineqartut annertusineqarput, tassami ukiut siuliinut naleqqiullugu 25 mio. kr-nik amerlanerusunik aningaasaliisoqarmat, ukiunilu aggersuni suli 100 milliunilikkaanik amerlanerulersussaapput, Naalakkersuisooqatigiit siunniuppaat inuusuttut pingasuugaangata marluk ilinniakkaminnik nammassisaqartalissasut. Taamaammat pingaaruteqarluinnarpoq meeqqat, inuusuttullu atugaasa, isumannaatsumik aqqissuunneqarnissaat, taamatullu anguniaqassagutta meeqqueriviit atuarfiillu ullutsinnut ilinniartitaanermi naleqquttut pilersitariaqarpagut.

Atuarfiit atuarfitsialammut naleqquttunngorlugit aqqissuunneqarnissaat innuttaasut kissaatigisaat illutaasigut imaarisaatigullu nukittorsaaffigalugit pitsanngorsarlugillu naammassiniarlugit Naalakkersuisut ilungersuuteqarput, atuarfiit nutaat suliffigiuminartut meeqqanut, ilinniartitsisunullu pitsaasumik atugassaqartitsisut sananeqarnissaannut. Illoqarfinni nunaqarfinnilu atuarfiit pitsanngorsagassat tulleriaarneri naammassisimalerput, qujanartumillu ukiumi nutaami sanaartornerit sukkanerusunngorlugit aallartinneqarsinnaanngorlugit aamma aserfallaatsaaliinissamut pilersaarutit tulleriarneqareerlutik ingerlanneqartussanngorput, neriunniartalu angusaqarfiusumik naammassilluarumaartut, tamannalu iluatsillugu atuarfitsialaap anguniarneqarnerani suleqataasimasut tamaasa, ilinniartitsisullu sulilluarnerat Naalakkersuisut qujassutigaat,

Ukioq qangiuttoq eqqarsaatigalugu inuusuttut arlalippassuit ilinniakkaminnik naammassinnippit ilinniarnertuunngortut ilinniartitsisunngortullu aatsaat taamak amerlatigisut naammassippit, ukiullu kingullit 25-it Namminersornerulernermit inuusuttorpassuit ilinniakkaminnik naammassinnilluartarsimapput, aningaasarsiornikkut arriitsumik qaffakkiartoraluarluta ilinniarsimassutsikkut ukiut tamaasa pisuunngoriartornerput tulluusimaarutigissallugu pissutissaqarpugut, inuusuttut piumassuseqarluartut akisussaassuseqarluartullu saqqummeriartornerat tassuuna takusinnaavarput. Nersussallusi pissutissaqarpugut siunissami ingerlalluarnissassinnik kissaappassi.

Ukiorpasuarni aamma anguniarneqartoq Ilimmarfik sananeqartussanngorpoq. Nunatsinnimi nammineerluta ilinniagartuunik pissaqassagutta ilinniartitaanermi kulturikkullu annertusaanissaq pinngitsoorsinnaanngilarput. Ilinniartitsisut atorluarneqassappata ataatsimoortumik pitsaasumik ilinniarfeqarnissaq pinngitsoorneqarsinnaanngilaq aamma ilinniagaqartut ikioqatigiinnermikkut atorluaanermikkullu pitsaasumik angusaqarnissaat qulakkeerneqarsinnaammat, tassami ilisimatusarfimmi

periarfissat killeqaqisut annertuumik pitsaangoriateqassapput ilinniartut ilinniartitsisullu tamarmik malugilluagaannik ilimmarfik sananeqarpat.

Kalaalinningsaaneq nunatsinni iluatsissappat innuttaasut annertuumik pisussaaffeqarput ilinniartitaanermi annertuumik peqataassallutik, kalaallit inuiaqatigiit isiginnaartuinnartut inissisimanagerat qaangerneqassappat ilinniartitaanermi aamma pisussaaffiit allatulli ataqqineqarlutik malinneqarnissaat pisussaaffigaarput. Ilinniartullu inuusuttorpasuit angusaqarluartartut siunissami isumalluarfigalugit kalaallit namineerlutik ingerlatsinerulernissat angujartuarneqassasoq isumalluarfigaarput, aammalu kalaallit sapiisernerullutik atorfinnut sassartertarnissaannik kaammattorniarpakka nalunngilara pisinnaasusi sapinngitsusilu.

Innutaaqatigut oqaatsit pillugit aporfissinneqartartut pingaartumik kalaallit, kalaallisut oqalussinnaanngitsut, periarfissaasa pitsanngorsarneqarnissaat Naalackersuisoqatigiinni ilungersuullugu aaqqinniassallugu neriorsuutigissavarput, tassami ilaatigut paatsooqatigiinnikkut pisartut ilungersunarsinnaasartut pinngitsoorsinnaasaraluagut naammattoortaratsigit, tamatta nunami maani inissaqartariaqarpugut periarfissaqartariaqarlutalu. Kalaaliugutta, qallunaajugutta, allamiuguttaluunniit tamatta Kalaallit Nunatsinni inissaqassaagut aammalu ilinniartitaanerit eqqarsaatigalugit kalaallisuinnaq oqaasillit periarfissaasa pitsanngorsarneqarnissaat, aqcutissiunneqarnissaallu ilungersuullugu suliarineqarpoq naammassiniarneqarlunilu.

Naalackersuisoqatigiit pingaartilluinnarpaat kommunit iluarsartuuteqqinnissaannut suliap sukumiisumik suliarineqarnissaa, ukiullu marluk sulinissaat tunngavigalugu nunatsinni innuttaasut kommuunillu peqataalluassasut kammattuutigaarput, ilissimi pillusi kiffartuussinerit sukkanerusumik akikinnerusumillu aaqqissuussiffiginiarneqarmata. Suliarli kinguneqarluassappat pingaarluinnarpoq illit uangalu tamatta ilusilersueqataanissarput kingusinaartigata,

Naalackersuisummi pingaartilluinnarpaat innuttaasut tikillugit sullissinerit ingerlanneqartariaqartut tamakkuninngalu ilisimasaqarnerpaat tassaapput kommuunit innuttaalu. taamaammat pingaaruteqarluinnarpoq innuttaasut kommuunillu peqataalluarnissaat piumasarissallugu.

Piniakkanik aalisakkanillu atuinerput sillimmartaarfigalugu aaqqissuuttariaqalerparput, pinngortitap allanngoriarthonera pissutigalugu, issittumi uumasooqatigiaat allanngorujussuarsinnaanerit annertuumik ilaatigut uagutsinnut ajornartorsiummik pilersitsinnaasoq sillimmartaarfigalugu susassaqtartut, aamma issittumiittut nunat allat peqatigalugit aaqqissuussinissaq aallartitariaqalerparput, nunatsinni silap allanngornera ukiumi sikuusarnerup sivikillinera kingusinaartarneralu, silallu anorlerajuppallaalnera annertuumik piniartukkormiunut malunniutereerpoq, taamaammat puisinniarneq kisiat aallaavigiunnaarlugu inuutissarsiutinik allanik siuarsaanissarput aallarereertariaqalerparput, aalisakkanik atorluannaissaq aalisarfissanillu nutaanik nassaarniarnissaq minnerunngitsumillu takornariartitsinnikkut ilinniartitsinikkullu annertusaanissarput piniartukkunnut aalisartukkunnullu aaqqissuuttariaqalerparput, sussaqtartullu allat tamaasa kajumissaarniarpakka annertuumik peqataaqqullugit sillimmartaarnissarput pinngitsoorneqarsinnaajunnaarmat. Eqqaamassavarput peqataasut amerlanerugutta eqqarsaatit isummallu amerlanerit pinngortissavagut tamanut iluaqusiinerusussat.

Pisuussutinik uumassusilinnik atuinerput naleqqussarniarlugu ilaatigut sukkanerusumik aqutsisoqalernissaa saneqqunneqarsinnaajunnaartoq inuiaqatigiinnut oqaatigissavara,

ilaatigummi sippulimmik atuisarnerput, qaleralinniarneq assersuutigigaanni illersorneqarsinnaanngitsumik atuisoqarpoq tamakkulu tunngavigalugit Naalakkersuisoqatigiit pilersaaruteqarput qaleralinnik killilersuinissaq pisassiiikkut eqqunnarlugu, ukioq 2005 atorneqassaaq aalisartut piniartut kattuffii sulisartut kattuffii, tunisassioortullu peqatigalugit siunissami ingerlasissamik aqqissuinnermut, Naalakkersuisullu pilersaarutigaat 2006-mi atuinerup naleqqussarnissaa eqqunneqassasoq.

Oqartarpugut pimoorutivillugu meerartagut inuusuttagullu nunatta siunissarigaat. Ukiuni kingullerni ilungersunartumik annertusiartuinnartumik naapittalerpagut meeqqanik sumiginnaaneq, meeqqanik atornerluineq, inuusuttut sumiginnakkat amerliartuinnartut, susassareqatigiinerit tammariartuinnartut, meeqperivinni meeqqat aaneqanngitsoortartut, atuarfinni aserorterinerit annertusiartuinnartut innuttaasut immikkoortitaarluta inooriaseqalernerput ilaatigullu ineriartornerup sukkavallaartumik ingerlanerata kingunerisaanik innuttaasut katatagut amerlaqaat, ajornartorsiutitulli taakkaartukkagut innuttaasunut tutsittuaannarsinnaanngilagut.

Uagut politikereit ilungersunartumut pisooqataalluta nassuerutigisariaqalerparput, innuttaasut tikillugit suliniarta tamatta. Innuttaasut atugaasa pitsaanerulernissaat aqutissiunniartigu. Meerartatta inuusuttortattalu ataqqinartumik siunissami inuuneqarnissaat aallaavigalugu! Siunissaq aamma oqaluttuaannanngortartoq kusanartumik oqaluttuassartaqartissagutsigu kingornussusissatta meerartatta angerlarsimaffissaat toqqissisimanarnerusoq pilersinnarlugu ataatsimoorluta siunertaqatigiilluta sulisariaqalerpugut.

Nunaqarfimmiut sullinneqarnerisa pitsanngorsarneqarnissaat ukiorpassuarni anguniarneqarlunilu annertuumik allanngortiterinerimik nassataqartarsimasoq, aamma ukiortaamiit allanngortinneqqaqqissaaq, tassani siunnertarineqarluni sullissinerup pitsaanerulersinneqarnissaa ilaasunik kiffartuussinerimik, nioqqutissanik pajuttornerimik, minnerunngitsumillu tunisassiornikkut aqqissuusseqqinnissami.

Ukiorpassuarni nunaqarfimmiut selskabet akisoqisumik immikkoortitaaqqisumillu kiffartuussinerat ingerlasimavoq ilaatigut nunaqarfimmiunut ilungersunartumik atugaqarfiusarluni. Nunaqarfimmiut ilaatigut 70-nik inulinni selskabet assigiinngitsut ilaatigut arfinillit ingerlatsisarput soorunami akisoqisumik ataqatigiiffiunngitsumillu. Taamalilluni selskabet soqutigisaat kisimik salliutinneqalerparput, nunaqarfimmiut sullinneqartut ilaatigut tunullinneqarlutik aallaavigineqarpallaarnatillu. Tamakku aqqinneqarnissaat ukiorpassuarni nunaqarfimmiut nilliaatigiuarsimavaat, minnerunngitsumillu nunaqarfimmiut peqatigiiffiata suleqateqarlunera pissutaalluni allannguinerit pisinnaanngorsimasut nunaqarfimmiunut qujassutigissavagut.

Aammalu nunaqarfimmiut illussaqaarniarnikkut atukkat ilungersunarluinnartut aqqinniarlugit pitsanngorsarniarlugillu Naalakkersuisut sulinerimikkut aningaasat amerlanerusut nunaqarfimmiut atugassanngortippaat taamatullu illuliassat sananeqarnerini nakkutilliinerup pitsanngortinneqarnissaa aqqiissuteqarfialugu taamaalilluni illuliassat inerneqanngitsoortartut ikinnerpaaffissaanut pisinneqarsinnaanngorlugit.

Akilerarutinerit allannguinerit pissakinnerit eqqarsaatigalugit aqqissuunneqartoq aningaasarsiakinnernut iluaqutaalluassasoq oqaatigissavarput, utoqqaat, sulisinnaajunnarnersiutillit, aalisartut piniartullu, ilaqutariit sulisartukkormiut allallu aningaasarsiakinnerusut annertuumik iluaquserneqassapput, kisiannili aamma sulis taamaakkaluartoq inuuniarnikkut atukkagut nunatsinni assigiinngippallaqaat sulis annerusumik

taamaammat naligiinnerusumik atugaqarnissarput eqqarsaatigalugu naleqqussaanissaq aalajangiusimavarput.

Nunatta nunanik allanik suleqateqarnera annertuumik suli ingerlanneqartariaqartoq Naalakkersuisut pingaartillugu oqaatigissavaat, nunat avannarliit suleqatiginerat ajunngitsumik ineriartorfiusoq suli nukittorsarnerullugu ingerlanneqarnissaa siunnerfigaarput. Taamatuttaaq akitsinni naggueqatitsinnik suleqateqarnerput suli ineriartortinneqartuarpoq.

Amerikkarmiunut isumaqatigiissutip sunniuteqarluartumik kinguneqarnissaa pimoorullugu Naalakkersuisut qallunaat suleqatigalugit ingerlappaat anguniagassat pissangartut siunnerfigisagut tassaapput iliniartitaanikkut ilisimatusarnikkut niuernikkut angallannikkut takornariartitsinikkut aatsitassarsiornikkut nukissiuuteqarnikkullu suleqatigiissutissagut annertuut ingerlanneqartut.

Qallunaat naalakkersuisuinik suleqateqarneq ajunngilluinnartumik aammalu ataqeqatigiiffiusumik ingerlanneqarpoq minnerunngitsumillu aamma Namminersorneq pillugu kommissioni pilersinneqartussanngormat siunnerfigut aallaavigalugit peqataalluernerat iluarisimaarlugu qujassutigaarput. Kommissionip sulinerata ataqatigiiffiusumik ingerlanneqarnissaa Naalakkersuisut pingaartilluinnarpaat suliassaq pissanganartoq kisianni annertuumik pisussaaffiliisoq kusanartumik inerneqassappat ataqeqatigiilluta tatigeqatigiilluta sulinissarput tamatta pisussaaffigaarput illuatungaannaanut akisussaaffigitinneqarsinnaanngitsoq.

Peqqinnissaqarfimmit kiffartuunneqarnerput annertuumik ukiuni kingullerni pitsanngoriartorpoq ineriartoqalunilu. Peqqinnissaqarfiulli inuup peqqissuunissaa kisimi akisussaaffiginngilaa, akisussaaffik inunni ataasiakkaaniimmat aamma. Ataasiakkaarluta peqqinnerulissagutta immitsinnut piumaffigisariaqarpugut pinaveersaartitsinerup pitsaaliuinerullu atornerulernissaanut, pitsaaliuineq pinaveersaartitsinerlu katsorsarneqarnermiit pitsaanerummat.

Meeqqat inuusuttullu peroriartornerminni atugarisaat pitsanngorsaqkikumallugit suliniutigut aallartissimasut suli sukumiinerusumik ingerlanneqarnissaat pingaartitatta annersaasa ilagivaat.

Meeqqat inuunerminni pitsaasumik aallartinnissaat pingaarpoq, taamaattumik tamanna tunngavigalugu erninermi sulinngiffeqartarnerup sivitsorneqarnissaa Naalakkersuisoqatigiit pingaartillugu piviusunngortinniagaasa ilagaat, tamannalu upernaamut aningaasanut inatsisissamut ilanngunneqassaaq.

Nunatsinni ilageeqarneq anersaakkut nukittoqutitta pingaartut ilagaat taamaattumik ilageeqarneq atuartitaanerlu pillugit inatsisip 1905-mi atuutilersup ukiunik 100-rujuliinissaa 2005-mi aprilip aallaqqaataani ilaatigut ilageeqarnerup ataatsimeersuaatigineqarneranik aammalu immikkut nalliuttorsiorneq pillugu allagaqaasiofigineqartussaq qilanaaraara.

Naggataatigut innuttaasut tamaasa ukiortaami ajunngitsumik kissaallugit pilluaquakka. inuiaqatigiinni suleqataasimasut tamassi Ikinngutigut sulisartut, aalisartut piniartullu, savaatillit, atorfillit, allallu inuiaqatigiinni tamani sulillutillu kiffartuusseqataasut qutsavigaassi. Utoqqaat ilissi aamma inuiaqatigiinni suleqataalluarsimallusi utoqqanngortusi tamassi uummammik pisumik qutsaavigaassi, ilissi sulilluarnissigut ullumikkut atugarissaalluta inuunitsinnut ilissi pissutaalluinnarput, ataqinartumik atugaqarnissassinik utoqqanngornissinni kissaappassi.

Ukiortaami pilluaritsi!

Guutip nunarput sernigiliuk!